

## 2 Tetadönitenteidi inänite Pabodo cadota ante ayänta nänö yewämongainta

**Pabodo, Waa quëwëedäni,  
ante apänecampa**

**1** <sup>1</sup> Botö Pabodobo inömo imopa. Mönö töninäda Tidibänö tönö Tımoteo tönö godongämä apänete ate yewämömo aedäni. Tetadönica iñömö quëwëmini inte Codito ingante godongämä mīni pönencabo inömini inte ëñeedäni. Minitö mönö Mämpo Wængonguī nempo ayä mönö Awënë Itota Codito nempo quëwëmini iminipa. <sup>2</sup> Mönö Mämpo Wængonguī tönö mönö Awënë Itota Codito waadete pönö cæda ate mīnitö gänë entawencämīnīmpa, ante yewämömönīpa.

**Itota Codito pongä ate Wængonguī  
apänte pancæcäimpa**

<sup>3</sup> Mönitö töninäminī ëñeedäni. Mīni wede pönönö godömenque päte bai impa, ante ayä tömämīni wacä ingä wacä ingä mīni waadete pönönö waa pönī päte bai iminipa. Mänömaī beyä mönitö mīnitö beyä ante Wængonguī ingante cöwë waa ate pönëninque apänequëñëmöni imönīpa. <sup>4</sup> Wadāni mīnitö iminite quiëmë togäwëninque wënä wënä cædāni caate wämīni incæ quiëmë beyä wëwëminī incæ mīnitö wëntäye ināmaī inte ee cämīnīpa. Mänömaī beyä Wængonguī ingante godongämä nāni pönencabo wayömo wayömo quëwëñönānite mönitö incæ mīni cæinö ante waa adinque cöwë apänemönīpa. Ayä mīni wede pönönö ante cöwë apänemönīpa. <sup>5</sup> Mänīnö ante beyä Wængonguī apänte nänö panguinö

ante, Tömengä cöwë nö panguingänö anguëñë, ante do ëñëmōmpa. Mänömaī beyä mīnitö Wængonguī Awënë Odeye nempo guicæte ante eyepä waa pönī bacämīnīmpa. Mīnitö do mänīnö Wængonguī nempo mīni öönädë quëwënguīnö beyä wäwente quëwëminīpa.

<sup>6</sup> Wængonguī nē nö cædongä ingampa. Edæ wadāni mīnitö iminite wënä wënä cædāni ate wëwëminī iñöminī tömengä wæätë tömëñāni inänite wënä wënä cæcä ate wæwencædānīmpa. <sup>7</sup> Ayä mīnitö nē wëwëminī iñöminīte pönö cædinque tömengä mönitö imönite adobai pönö cæcä ate tömämö mönö wëwëñāmaī baquimö imōmpa.

Mönö Awënë Itota tönö tömengä anquedoidi nē täi piñänte cædāni tönö öönädë ongonte pö gonga bæcote bai godongämä wæññönāni tömämö ayömo mänömaī bacäimpa. <sup>8</sup> Mönö Awënë Itota ingantedö ante mönö watapä apänedö ante nē ëñëñāmaī cædāni iñömö, Wængonguī æbänö ingaingä ingää, ante ëñëñāmaī ināni iñönānite tömengä mänīñāni inänite pante cæcæcäimpa. <sup>9</sup> Wængonguī adodāni inänite päninque æmäwo wo ewencæcäimpa. Tömëñāni iñömö Awënë Itota weca tömengä nänö täi piñämāmo wäemö pönī nänö ëmönömö mänīñömö pö guidāmaī incædānīmpa, ante Wængonguī wææ cæcæcäimpa. <sup>10</sup> Awënë Itota nänö ponguïönæ Wængonguī mänömaī cæcæcäimpa. Mänīönæ Itota quīñāni iñömö nē täiyä wäemö ewocate quëwëñāni inte tömengä ingante waa

acädänimpa, ante poncæcäimpa. Ayæ tömengä në pönänäni weca pöñongante tömenäni tömänäni, Tömengä waa pöni cæcä amönipa, ante watapæ ancädänimpa, ante cæcæte ante poncæcäimpa. Ayæ minitö adobai mönitö apænedö ante ëñëningue pönëmini inte tömengä quimäni iñömö mönitö tönö adobai cæcæminimpa, ante cæcæte ante poncæcäimpa.

<sup>11</sup>Mänömai beyæ mönitö minitö beyæ ante woyowotæ itædë Wængongui ingante apænemönipa. Wængongui, Mini quëwenguinö ante quëwencæminimpa, ante minitö iminite apænte ængä iñingue mönitö, Minitö eyepæ waa pöni bacæminimpa, ante mönö Mæmpo Wængongui ingante apænemönipa. Minitö, Mönitö waa cæcæmönimpa, ante mini änö bai tömänö ante Wængongui nänö tæi piñæmamo inte iinque cæcæcäimpa, ante apænemönipa. Ayæ mini wede pönëno beyæ minitö cæquino tömänö ante tömengä adobai iinque cæcæcäimpa. <sup>12</sup>Mönö Awënë Itota pönö cæcä beyænque minitö waa pöni cæmini adinque wadäni tömengä ëmowo ante waa ate apænecädänimpa. Ayæ tömengä mänömai cæcä beyænque wadäni, Minitö waa quëwëmini iminipa, ante minitö iminite waa acädänimpa. Mönö Mæmpo Wængongui tönö mönö Awënë Itota waadete pönö cæda bai mänömai bacäimpa, ante mönitö mäninö ante Wængongui ingante apænemönipa.

**Mönö Awënë Itota nänö  
ponguiönæ æbänö baquii, ante**

**2** <sup>1</sup>Mönitö toniñamini ëñeedäni. Mönö Awënë Itota Codito nänö ponguinö ante ämönipa. Ayæ tömengä æbänö, Botö weca pöedäni, ante gæcä goquimö imompa, ante apænedinque minitö iminite iimaï ämönipa. <sup>2</sup>Minitö weca quëwënanäni pancadäniya iñömö, Mönö Awënë nänö ponguiönæ do batimpa, ante änäni ëñëningue minitö idiquibæ pönënamai bacæminimpa, ämönipa. Edæ mönitö Wængongui beyæ në apænemöni inte möni apæneyedë

incæ möni odömonte apæneyedë incæ möni yewämöintaa yewämöñedë incæ æyedëmë incæ apænemönipa, ante mäninäni iñömö mönitö imönitedö ante apænedinque, Pabodoidi mäninö ante apænedäni inänipa, ante tededäni ëñëningue minitö guiñente wädämai iedäni ämönipa. <sup>3</sup>Æcämenque angä æbämë nänö änö ëñëningue minitö oda cæte godämai iedäni.

Edæ waodäni tæiyänäni Wængongui ingante Baa ante wadæ godäni ate wacä në wiwa cæcä inte pongä acäimpa. Ayæ tömengä pongä ate mönö Awënë nänö ponguiönæ bacäimpa. Mäningä në wiwa cædongä iñömö Wængongui æmæwo nänö në wo ewenguingä ingampa. <sup>4</sup>Æcämenque ingante, Wængongui ingampa, ante waodäni waa adinque ædæ wæëningue apænedäni incæ ayæ quiëmë adinque, Wængongui impa, ante waa adinque apænedäni incæ mäningä në wiwa cædongä iñömö wængonguiidi nänö në änönäni tömänäni inänite Baa äningue nämä ængö cæte bai cæcä inongampa. Wængongui oncö tæiyæ waëmö oncönë adocä pö guiite tæ contadinque, Botö tömëmo wængonguimo inömo imopa, angä ingampa.

<sup>5</sup>Botö minitö weca quëwëñedë mäninö ante minitö iminite apænetabopa. Wii ëñëminitawo. <sup>6</sup>Adocä në wiwa cædongä iñömö Wængongui nänö äönæ mäniönæque edonque pongä acädänimpa. Iñingue quino beyæ ante mäningä ayæ pönämai ingää, ante minitö nöwo do ëñëmünipa. <sup>7</sup>Adocä awëmö nänö wiwa cæpämö incæ do ëñente cädäni inte waodäni tæiyänäni quiëmë wiwa i, ante do cädänipa. Incæte tömenäni inänite, Wiwa cädämai iedäni, ante në wææ cædongä iñömö adodö ante godömenque wææ cæcä ingampa. Në wææ cæcä ingante guiquënë wacä wæætë, Mäninganca idæwaa, äningue ö ængä wadæ gocæcäimpa. <sup>8</sup>Mäniñedë në wiwa cædongä iñömö edonque pongä acädänimpa. Incæte Awënë Itota

pöninque tömengä nänö öö guëmämämo inte mäningä ingante wænongå wænguingä ingampa. Tömengä nãö apäite emönongä inte pongä adinque nê wîwa cædongä guiquenê æmæwo wo ewente bacæcäimpa. <sup>9</sup>Wîwa cædongä ingante Tatána nänö tæi piñæmämö inte da pönongä ponguingä ingampa. Tömengä nänö mä cæ bai quiëmê bamönengæ cæcä adinque waodáni, Æbänö cæcää, ante oda cæte gocædänimpa. <sup>10</sup>Ayæ quiëmê wænæ wænæ nänö cæpämö beyæ nê æmæwo wo ewente baquináni iñömö oda cæte godänipa. Edæ Wængongui nawangä nänö angainö ante waadete pönënamai iñönänite Wængongui tömënanî inänite, Quëwencæminimpa, ante ædö cæte ænguingää. Mänömai beyæ tömënanî æmæwo wo ewente bacædänimpa.

<sup>11</sup>Mänömai beyæ, Tömënanî nê wîwa cædongä wapiticæ nänö angainö ante pönencædänimpa, ante cædinque Wængongui tæi piñænte cæcä beyænque tömënanî babæ ante pönente oda cædänipa. <sup>12</sup>Edæ Wængongui nawangä nänö angainö ante nê pönënamai inináni inte wæætê, Mönö wentamö mongæmämö incæ waa impa, ante watapæ todináni iñönänite Wængongui mänináni tömänänî inänite apænte ante pancæte ante mänömai cæcampa.

**Wængongui, Quëwencæminimpa,  
ante nê apænte ænináni**

<sup>13</sup>Mönitö töninãmîni mînitö mönö Awënê Itota nänö nê waademîni inte ëñeedäni. Inguipoga badönämai iñedê Wængongui mînitö imînite do, Quëwencæminimpa, ante apænte ængacäimpa, ante mönitö mînitö beyæ ante tömengä ingante waa ate pönëninque cöwê apænequënëmöni imönipa. Tömengä iñömö, Botö Önöwoca pönö cæcä ate tæiyæ waëmö ewocamîni inte mînitö nawangä botö angainö ante pönëmîni beyæ quëwencæminimpa, ante mînitö imînite ængacäimpa. <sup>14</sup>Itota ingantedö ante mönitö watapæ apænedö beyæ

Wængongui, Quëwencæminimpa, ante mînitö imînite apænte ængacäimpa. Tömengä, Awënê Itota Codito nãö nänö emönö bai mînitö adobai nãö bai entawencæminimpa, ante cædinque mînitö imînite apænte ængacäimpa.

<sup>15</sup>Mönitö töninãmîni ëñeedäni.

Mänömai beyæ tæi ongonte quëwëedäni. Edæ mönitö önöne inte tedemöni ëñënimîni incæ yewæmointa yewæmömöni adinque ëñënimîni incæ mînitö mönitö odömönte apænedinö ante iimpo cædämai quëwëedäni.

<sup>16</sup>Mönö Mæmpo Wængongui mönö imonte nê waadecä inte pönö ædæmö cæcä ate mönö, Tömengä weca cöwê quëwëuimö imompa, ante pönëninque wampo pönëmö inte quëwëompa. Ayæ, Waa bacæimpa, ante mönö pönëmompä. Iinque tömengä tönö mönö Awënê Itota Codito, Iimai cæcædäimpa, ante ämönipa. <sup>17</sup>Tömëna ædæmö apæneda beyænque mînitö wampo pönëninque tæi ongonte quëwencæminimpa. Ayæ tömëna cæda beyænque mînitö æmæwo pægaimîni inte tömäi mîni waa cædö ante mîni waa änö ante tæi piñænte cæcæminimpa.

**Mînitö mönitö beyæ ante  
Wængongui ingante apæneedäni**

**3** <sup>1</sup>Adodeque ante iinque yewæmömönipa. Mönitö töninãmîni ëñeedäni. Mînitö mönitö beyæ ante Wængongui ingante iimai apæneedäni. Mönitö wayömö wayömö gote möni apæneyömö mönö Awënê nänö angainö ante nangui inäni quingæ ëñencædänimpa, ante apæneedäni. Ayæ, Mînitö bai wadani adobai iï änö ante Wængongui ingante waa ate pönëninque æncædänimpa, ante mäninö ante Wængongui ingante apæneedäni.

<sup>2</sup>Wadani nê wænæ wænæ cædäni inte wîwa cædäni iñömö tömënanî mönitö imönite wænæ wænæ cædämai, ante mänii beyæ ante mînitö adobai Wængongui ingante apæneedäni. Edæ wiï waodani tömänänî pönënanî inänipa.

<sup>3</sup>Incæte mönö Awënê cöwê ædæmö aacä inongä ingampa. Tömengä pönö

cäcä ate mīnitō ämæwo pægaīmīni inte tæi pīñante cæcæmīnīmpa. Ayæ, Tatāna mīnitō imīnite wænæ wænæ cædāmai incæcäīmpa, ante Wængonguī adobaī aacä incæcäīmpa. <sup>4</sup>Mīnitō imīnite mōni wææ änō ante ēñēnīnque do cæmīni incæ godōmenque adodō cæcæmīnīmpa, ante Wængonguī pōnō cæcæcäīmpa, ante mōnitō do pōnēmōnīpa.

<sup>5</sup>Wængonguī nānō waadete pōnēnō ante ēñencæmīnīmpa, ante mōnō Awēnē taadō ēñente odōmonte bai pōnō odōmongä ate mīnitō mīmōnē ēñencæmīnīmpa. Itota Codito pōnō cæcä beyænque mīnitō wæntæye ināmai inte ee cæcæmīnīmpa.

#### **Cæcæte ante mōnō cæquēnēnō**

<sup>6</sup>Mōnitō tōniñamīni ēñeedāni. Mōnitō mōnō Awēnē Itota Codito emōwo ante mīnitō imīnite wææ ämōnīpa. Mōnō tōniñadāni pancadāniya wæntæye ināni adīnque ayæ mōni odōmonte apænedō mīni ēñente ænīnō bai quēwēnāmai ināni adīnque mīnitō iñōmō mänīnāni tōmānāni inānite gomō aedāni.

<sup>7</sup>Mōnitō cægai bai mīnitō æbānō adobaī cæquēnēmīni imīnīpa, ante edæ tōmēmīni do ēñēmīnīpa. Mōnitō mīnitō weca quēwēñedē wæntæye ināmai quēwentamōnīpa. <sup>8</sup>Ayæ adobaī æcāmenque cænguī ante nāni pōnōni ænīnque mōnitō ononque ænāmai inte wæætē paga cæte cæntamōnīpa. Ayæ, Mīnitō cænguīnque ante pōnēnīnque wædāmai incæmīnīmpa, ante mōnitō, Tōmēmōni cænguī cæncæmōnīmpa, ante woyowotæ itadē nanguī cædīnque quēwentamōnīpa. <sup>9</sup>Mōnitō mīnitō imīnite, Mōni quēwengæīmpa, ante, Cænguī tōnō mōnitō owoquīncō pōnōmīni æncæmōnīmpa, ante änāmai intamōnīpa. Mōnitō mänōmai ante bai waa incædōnīmpa. Wæætē æbānō mōnitō cætamōnīi, ante adīnque mīnitō adobaī cæcæmīnīmpa, ante cætamōnīpa. <sup>10</sup>Edæ mōni mīnitō weca quēwēñedē incæ mōnitō mīnitō imīnite, Īīmai cæedāni, ante wææ antamōnīpa.

Adocanque nē mōnō cæquēnēnō ante, Wīi cæinēmo, angä iñongante mīnitō tōmengä ingante cænguī godōnāmai inguēnēmīni imīnīpa.

<sup>11</sup>Mīnitō weca pancadāniya ononque cædāmai a ongonque quēwēnāni inānīpa, ante änāni ēñēmōnīpa. Adodāni nē Baa änīnque cædāmai ināni inte wæætē, Wadāni æbānō quēwēnānīi, ante godō wæntæ godō wæntæ tededāni inānīpa. <sup>12</sup>Mōnitō mänīnāni inānite mōnō Awēnē Itota Codito emōwo änīnque, Mīnitō iīmō iñō iīmō iñō nanguī cæte quēwēedāni, ante wææ ämōnīpa. Tōmēmīni cæte beyænque mīnitō cænguī ænte cæncæmīnīmpa, ante ancaa apænemōni imōnīpa.

<sup>13</sup>Mōnitō tōniñamīni mīnitō guiquēnē, Quiēmē waa impa, ante wæntædāmai inte cōwē cæedāni. <sup>14</sup>Mōnitō mīnitō imīnite iī yewæmōintaa mōni yewæmongainō ate adocanque ēñēnāmai cæcä inīnque, Tōmengä æcānō ingää, ante aedāni. Ayæ tōmengä guingo imonte wæcæcäīmpa, ante tōmengä ingante gomō aedāni. <sup>15</sup>Mīnitō adocä ingante, Wīi wacä ingampa, ante pōnēnīnque wæætē tōmēmīni biwīidi inānite ante bai tōmengä ingante wææ ämīni ēñencæcäīmpa.

#### **Waa quēwencæmīnīmpa, ante Pabodo angampa**

<sup>16</sup>Mōnō Awēnē Itota nē piyænē cædongä incæ tōmengä pōnō cæcä ate mīnitō æbāmenque bamīni incæ cōwē piyænē cæte quēwencæmīnīmpa. Mōnō Awēnē mīnitō tōmāmīni weca a ongoncæcäīmpa, ämopa. <sup>17</sup>Botō Pabodobo ñōwo tōmēmō onompoca yewæmōnīnque, Mīnitō imīnite waa pōnēmopa, ante yewæmōmo aedāni. Pabodo nānō yewæmōinta impa, ante ēñencæmīnīmpa, ante cædīnque botō tōmanta yewæmōnīnque mänōmai bai yewæmōmopa. <sup>18</sup>Mōnō Awēnē Itota Codito mīnitō imīnite waadete pōnō cæcæcäīmpa, ante botō mänīnque ante yewæmōmopa.